

Corisć fajeve inant, l Cor Enrosadira ve speta

L grop de ciantores da Moena à n nef maester, Franco Boschetto da Caran. De dezember i à tout part a n concert de benefizenza a Coredo



L Cor Enrosadira coi corisć premiè: Paolo Borgonovo, Federico Chiochetti, Mario Chiochetti, Vittorio Dariz e Gianfranco Zanoner, 31 egn; Giovanni Casagrande e Massimo Chenetti 32 egn; Marco Chenetti 35 egn.

I egn del Covid no é stac sorii per i gropes de volontariat, l é stat chi che à padi de più e chi che à sapù tegnir fora. L é stat egn senestres ence per l Cor Enrosadira de Moena che te chest ultim temp à stentà soraldut a troar n maester do che l à lascià su ence Alberto Zeni, che aea tout l post de Barbara Pedrotti, che aea ret la bacheta fin a la fin del 2018.

Te chisc doi egn passé l Cor à tirà inant, mingol col aiut del maester Luigi Chiochetti e mingol amò ence con la maestra Pedrotti fin che l'aisciuda passada l é stat bon de troar na neva vida, l maester Franco Boschetto da Caran. Col nef maester l é stat sobito n bon leam tant che al scomenz del 2023 i ciantores à portà dant n concert fora de anter.

Ge aon domanà de più al president Stojan Deville.

La USC Co éla che aede ciantà per benefizenza ensema al Cor Alpino 7 Larici de Coredo?

Stojan Deville Al scomenz l é nasciù dut beleche per sgherz, dapò envezé l é doventà na bela realtà. La é stata che la fia del maester Franco, che la cogn far cure al zenter NeMo de Perjen, la se à troà te stua con na femena de Coredo e rejonan le se à empensà che fosse stat bel endrezar n concert per binar su scioldi per comprar n machinarie per la riabilitazion per l zenter che costa passa 10 mile euro. Coscita, do aer rejonà coi doi cores, l é stat endrezà l concert «Voci di speranza» ai 21 dejené a Coredo e l é vegnù ence l

diretor de chesta clinica, i infermieres e le autorità politiche. L teater l era pien de jent e i à tirà su na bona zifra. Dapò l concert se à slargià fora la osc e te pech temp i é rué a duta la zifra per comprar l machinarie. Ge aon emprometù che fajeron n concert ence a Moena per recambiar l invit, fazile via per chest istà.

Co aede troà l nef maester e co ve troade?

Te chisc mesc passè aon seghità a se vardar entorn e ge aon domanà a n mulge de jent, no l é stat sorì, no ge n é tropes maestres e dapò no duc se met a la leta percheche l é n gran empegn. Franco Boschetto aea vidà l Coro Val Lubie da Caran e ence l Cor de gejia. Ades la va, al

scomenz l à cognù se usar int a nosc repertorie, ma l é trop desponibol ence col lengaz ladin. Ades sion vertesc per emparar trei o cater ciantie növe, calche una del Canori e de autres autores, tireron endò ca la ciantia La Fata, che la é stata armonisada dal maester Ilario Defrancesco sun test de Stefen del Monech che aveane emparà del 2016 per l CD. Col repertorie sion cec dal 2018, ajache canche se muda maester inant che n far de növe el l cogn ciapar te man chele velge. Sote l Covid chele pôce proe che aon fat le aon dorade per repassar.

Aede jà fat tropes concerc col maester nef?

Chest istà passà n aon fat cinch, dapò aon tot part a la rassegna di cores de la Magnifica Comunità a Ciavales olache l é stat premià i ciantores che à più che 30 egn de attività, dapò aon fat doi concerc ensema col Cor Valfassa, a Moena e a Pera e aon ciantà a la messa da Nadal.

Co siede metui coi ciantores?

A la fin del an passà l é vegnù int doi ciantores jovegn, speron che i reste. Tole l'ocajion per uzar fora n apel a chi che à amor per l ciantar de se far inant, no l é n gran empegn, fajon proe na oita en setemana. Via per chest an sarà ence da far le litazion per l nöf diretif che l é en ciaria dal 2017. Del 2018 se à demetu Paolo Defrancesco che l era president

e è ciapà te man giö per tirar inant per i doi egn che menciava, ma ades fosse ora de litar endodanöf. Aon ence renovà part de la mondura, con n bando de la Region vegnù fora del 2021 aon comprà le braghe e le maiete da d'istà e le ciamije növe.

Che aede en program per chest an?

L é da veder cotenc concerc che fajeron chest istà percheche do l Covid no aon le medeme entrade de inant. Speron che l Comun ne vegne encontra senò cogneron tacar a domanar sponsorisazion.

Intervista de Monica Cigolla



L maester Franco Boschetto.